



Gabinete Wever - Croes II

ISLA ((•)) NLINE

Dialuna 14 Maart 2022

Email: IslaOnline@gobierno.aw Tel: 528-4952

NOTICIA DI GOBIERNO

20
22

AÑA DI
INVERSION Y
OPORTUNIDAD





Durante reunion virtual entre Prome Minister y Minister di Relacionnan exterior di Reino

A TRATA VARIOS TEMA DI IMPORTANCIA INTERNACIONAL, ENTRE OTRO VENEZUELA Y UKRAINA



Recientemente Prome Minister tabatin un reunion virtual cu Minister di Relacionnan Exterior di Hulanda sr. Wopke Hoekstra. Esaki ta e prome reunion cu Prome Minister tabatin cu e mandatario Hulandes desde cu el a huramente como Minister.

Manera ta conoci, relacionnan exterior ta un asunto di Reino pues sr. Hoekstra ta representa ful Reino y ta hopi importante pa e tin alineacion cu Prome Minister Wever – Croes ora ta trata temanan di relacionnan exterior cu tin di haber cu Aruba.


Un reunion, segun Prome Minister, hopi importante cu a bay

bon y a toca entre otro e tema di Ukraina. Sr. Hoekstra a splica kico lo ta e aporte di Hulanda den e situacion aki. Prome Minister a pidi sr. Hoekstra pa tene cuenta cu e situacion cu Russia y Venezuela y Aruba cu ta asina cerca.

Tambe a papia di e tema di situaciona na Venezuela, mes cu ta un tema di relacionnan exterior, cu tin impacto hopi halto pa Aruba. Prome Minister a duna sr. Hoekstra tur informacion di con tur cos ta actualmente indicando cu cualkier cos cu cambia eyan na Venezuela, por afecta e estabilidad aki na Aruba tambe. A atende tambe cu e acercamento di Merca na Venezuela. 'Merca ta un partner sumamente importante pa Aruba, pa comercio, un partner cu por yuda riba tereno di seguridad, educacion, cuido y mas. Esaki ta conta tambe pa Colombia, cu tambe ta un pais cu Aruba kier estrecha lasonan cu ne. Ta mira otro partnernan tambe den region manera Panama', Prome Minister a agrega.



Continuacion A TRATA VARIOS TEMA DI IMPORTANCIA INTERNACIONAL....



Pa loke ta cyber security, Ukraina y Russia a declara otro un guerra cibernetico pues ta importante pa nos tene cuenta cu esaki. No habri websites of emails desconoci, cambia codico regularmente y asina tin diferente cos cu bo por haci, pa no bira un victima.

'Mi no ta kere cu ni Ukraina y ni Russia ta pensa pa bin ataca Aruba, pero tin un 'chaos' riba e tema cual ta causa cu hackers ta mas activo. Hospital su hacking a costa hopi tempo, energia y placa, pues ban purba evita esaki,' Premier Wever - Croes

a bisa.

Un otro tema di preocupacion ta e situacion di crudo, cual mundialmente a aumenta drasticamente. Si mira den Noticia internacional, e prijs pa gasolin ta subi cada dia. Na Aruba no, pasobra Aruba tin un otro sistema. Na Aruba ta ahuste cada 2 siman basa riba e promedio di e 30 dianan prome y esey ta causa cu tin mas trankilidad. Gobierno ta purbando pa wak si por absorbe un parti di e aumento cu ta bay bin ainda. Tur e calculacionnan ey ta andando y lo informa ora cu ta asina leu. Pero individualmente mester cuminsa prepara riba alternativa pa no uza autonnan mesun tanto.

Mescos ta e caso cu aumento di productonan como consecuencia di posibel inflacion cu lo importa.

Pa conclui Prome Minister a bisa cu ta importante pa ta consciente cu tin un conflicto y casi un guerra den mundo y esaki ta afecta nos tur p'esey ta importante pa nos ta prepara. Gobierno lo sigui cu esfuersonan di su parti y lo percura pa comunidad ta bon informa.

INVITACION

Ban hunto Celebra Dia di Himno y Bandera

Den nomber di Gobierno di Aruba,
Minister di Finansa y Cultura
mr. Xiomara J. Maduro
hunto cu CCDN

Tin e honor placer di invita e pueblo di
Aruba pa asisti na e celebracion di

Dia di Himno y Bandera

MANIFESTACION CULTURAL
Diahuebs, 17 di maart 2022
7:00 pm - 11:00 pm

For di 6:30 pm lo tin presentacion di
Caha di Orgel y Steelpan

Concierto: Atanero & Friends | Baile
Poema | Cuminda Crioyo | Boca Dushi
Mercado di Benta di Artesania.

★

ACTO PROTOCOLAR
Diabierna, 18 di maart 2022
9:00 am - 12:00 pm
Desfile di Gruponan Uniforma
Luga: Plaza Libertador Betico Croes

“Chikito y simpel bo por ta,
pero si respeta”

Prome Minister Evelyn Wever-Croes: DISCURSO DI PROME MINISTER NA CEREMONIA DI CONMEMORACION DI DOS AÑA DI COVID-19 NA ARUBA

Diadomingo 13 di maart Aruba ta conmemora dos aña cu Covid-19 a bati na nos porta. Riba 13 di maart, 2020, dos caso di Covid a wordo detecta. Pa e ocasion, Gobierno di Aruba a tene un ceremonia solemne dilanti di Bestuurskantoor pa conmemora esaki y recorda nos ciudadanonan cu a fayece cu Covid aki na Aruba. 'Den Union pa Recorda y miho Speransa pa Futuro'.

Prome Minister Evelyn Wever-Croes den un discurso hopi emocional a enfatisa cu e fe y confiansa di e ciudadanonan di Aruba, lo hiba nos na recuperacion y pa nos ta firme y resiliente como pais.

Discurso di Prome Minister Evelyn Wever-Croes:

"Mester cera scol, cera frontera, cancela celebracion di 18 maart, a bin toque de queda, y a tene tur hende paden. Mi ta corda tur e sentimentonan cu tabata domina e tempo ey den pueblo y den ami tambe. Preocupacion. Temor. Tristesza. Pero mes momento determinacion y un forza increibel pa enfrenta e reto aki y sali mas fuerte di dje. Nos a uni como un nacion, y nos a bringa e pandemia hunto. Awe nos tin e situacion hopi bon bou di control, y nos ta den e exit strategy caba, pendiente pa mira tambe kico mundo ta determina.

Awe, diadomingo 13 di maart, 2 aña despues, tin 52 caso activo. Ya ta un luna desde 13 februari, cu nos tin menos di 100 caso activo. Y nos capacidad na hospital ta completo pasobra nos no tin patient cu covid den ICU.

Aruba, un di e paisnan pionero den region asina ta dominando e pandemia, y na forma responsable a flexibilisa mayoría di e medidanan.

Nos tin un grado di vacunacion haltu. Di nos poblacion adulto (18+) 82% tin e prome vacuna, y 78% tin e di dos vacuna. Locual si ta preocupa nos ta cu solamente 31% di esnan riba 18 aña, a tuma e booster. Di aki mi ta haci un apelacion un biaha mas pa nos sigui cuida y sigui vacuna.

Sin embargo nos tin un dolor grandi, esey ta e mas di 6 miyon personanan cu a fayece rond mundo cu Covid, y den nan nos 212 rumannan cu a fayece cu Covid aki na Aruba. Awe nos a bin hunto pa recorda nan. Ban uni den oracion pa nan sosega na paz.



Ban tene den oracion tambe nan famianan, y esnan cu a stima nan. Tabata momentonan hopi duro di mester despedí di un ser keri. Y locual a haci'e hopi mas difícil den temporada di pandemia ta, cu mester a haci esaki den forma cu nos no ta custuma.

Mi ta spera cu e bunita recuerdonan cu boso tin di boso sernan keri, por duna boso forza cu e perdida aki.

Awe mi kier para keto tambe y gradici tur esnan cu a traha incansablemente pa nos combati e efectonan di e pandemia. Un pandemia cu a afecta nos país riba diferente área.

Continuacion DISCURSO DI PROME MINISTER NA CEREMONIA....

Cuido di salud:

Un danki na tur nos frontliners, cu den temporada di hopi inseguridad a sa di duna e miho cuida posibel. Docternan, enfermeronan, Ambulance, personal di DVG, DBZ, personal di test center y di taskforce. Cu no solamente tabata controla si personanan den isolacion ta na cas, sino den caso cu tabata necesario, tabata hiba cuminda pa nan tambe.

Siguridad:

Toque de queda, samenscholingsverbod, etc, medidanan cu ta limita bo movecion liber, y cu un impacto hopi grandi. Nos autoridadnan cu a mantene ordo, Polis, CEA, Aduana, tur esnan encarga cu cuida nos costa.

Economía:

Lamentablemente e efecto aun mas grandi a wordo sinti den nos economía. Hopi a perde trabou y hasta nan negoshi. Programanan di Gobierno manera FASW, subsidio di salario, alivio fiscal y asistencia na empresanan mediano y chikito, a yuda suavisa e dolor, pero e impacto asina mes tawata hopi grandi. Gradici esnan cu a lucha duro pa mantene nan negoshi habri, empresanan grandi, mediano y chikito, e weso di lomba di nos país, y principalmente pa mantene nos trahadonan na trabou.

Crisisteam:

Mi ta gradici e profesionalnan den henter e structura di Crisisteam cu a asisti nos den tuma e miho decisionnan posibel, bou condicionnan hopi hopi difícil. Nos tin un ekipo di hendenan dedica, prepara y cu curashi.

Finalisando mi kier pidi henter comunidad, pa awe nos reconfirma nos compromiso cu nos lo sigui lucha pa hiba nos pais padilanti. Nos lo sigui cuida, nos lo sigui vacuna. Mi no por garantisa cu no lo bin otro variante. Pero mi por garantisa si cu nos ta prepara bon, pa si e bin.

P'esey ta asina importante pa abo tambe vacuna.

Ora mi mira atras riba e dos añanan aki, mi ta mira un periodo difícil, hopi difícil. Un periodo cu hopi preocupacion. Pero mi ta mira tambe un periodo caminda cu nos cu ta biba aki na Aruba, a bay bek na nos raisnan, na nos costumernan. Nos a cera mas cu otro. Nos tabata yuda e bisiña of e familiar cu un sopi of un te di moringa. Nos a uni como país.

Y p'esey mi tin tur fe y confiansa cu lo bay nos bon den futuro. Manera nos himno ta bisa, Aruba Dushi Tera

Nos baranca tan stima

Nos amor pa bo t'asina grandi

Cu'n tin nada pa kibre.

Esey ta loke nos a demostra den e dos añanan aki, y pa esey mi kier yama bo danki”!



Prome Minister Evelyn Wever-Croes: En conexion cu celebracion di Dia di Himno y Bandera, **PROME MINISTER A BISHITA SCOL BASICO DE SCHAKEL**



Alumnonan di Scol Basico De Schakel, dialuna mainta tempran cu hopi entusiasmo tawata warda yegada di Prome Minister Evelyn Wever-Croes. E siman aki, en conexion cu Dia di Himno y Bandera, Prome Minister lo ta bishitando varios scol rond Aruba. Na De Schakel, Prome Minister a wordo ricibi pa Directora señora Inge La Haye y pa docente y alumnonan feliz cu e bishita di Prome Minister. Na su yegada, Premier a ricibi un bunita boket di flor.

Klasnan 5 y 6, a haya bishita di Prome Minister den klas na unda tawata tin un interaccion hopi special. Prome Minister a expresa cu el a ricibi hopi pregunta critico di parti di e muchanan. Nan tawata tin interes pa sa kico e trabou di Prome Minister ta encera y di Gobierno. 'Tabata bunita pa mira y experencia con bon prepara e muchanan ta pa e celebracion cu ta na caminda y tambe pa bida'.


Directora di scol basico De Schakel, señora La Haye, tambe a expresa cu tabata un bunita bishita y particularmete e alumnonan a haci hopi pregunta di e historia di Aruba y di Himno y Bandera. 'E bishita di Prome Minister tabata hopi



inspirativo, y nos ta hopi agradeci cu su bishta.'

Prome Minister a keda contento cu e interes di nos muchanan pa conoce mas di e historia di nos simbolonan nacional. Prome Minister a termina gradiciendo De Schakel pa e oportunidad y a desea tur mucha y tur docente un Feliz Dia di Himno y Bandera.

Continuacion PROME MINISTER A BISHITA SCOL BASICO DE SCHAKEL....





Minister Maduro di Cultura ta informa: 'MUSICA TA MI BIDA' TA E DOCUMENTARIO DI ARUBA SU MUSICO COMPLETO SR. RUFO WEVER



Na vispera di e celebracion di Himno y Bandera nos ta recorda e co-compositor di nos Himno Aruba Dushi Tera y alabes Aruba su musico completo sr. Rufo Wever. Den e documentario 'Musica ta mi bida,' nos ta sera conoci mas di acerca cu Rufo su pasion pa musica, su amor pa Aruba y tur su esfuersonan pa documenta e musica di hopi otro musico Arubano.

RUFO TABATA UN MUSICO COMPLETO

Aruba conoce hopi musico talentoso y sr. Rufo Wever tabata un di nan cu tabata un 'musico completo'. Rufo tabata domina diferente instrumento, tabata compone aregla y tabata skirbi partitura, un don cu tabata distingui Rufo fo'i demas musico di su tempo. Danki na Rufo, awe nos tin partidura di hopi musica tipico di Aruba, ya cu Rufo a percursa pa documenta musica di hopi otro musico di su tempo. Rufo a percursa tambe pa e partidura di nos musica di Cah'i Orgel y di nos Dande di fin di aña.

RUFO SU AMOR PA ARUBA TABATA GRANDI

Hopi cantica cu Rufo a compone tabata hiba e number di Aruba aden. Arubanita, por ehempel ta un cantica hopi conoci. Su amor pa nos Aruba a hiba Rufo pa ta co-compositor di nos Himno Aruba Dushi Tera. Hunto cu e musiconan Padu Lampe y Lio Booi, Rufo a percursa pa etala e cancion popular 'Aruba Dushi Tera' pa esaki keda resona como e Himno di Aruba.

E DOCUMENTARIO DI RUFO WEVER 'MUSICA TA MI BIDA'

Riba iniciativa di famia di sr. Rufo Wever, sra Vivian Wever hunto cu sr. Norman Thijsen di SkyTelevision a percursa pa produci e documentario 'Musica ta mi bida.' Di e manera aki nos por keda recorda Rufo como e musico completo di Aruba y nos yiunan por keda inspira pa e musico cu Scol di Musica Rufo Wever ta hiba su number. E invitacion ta pa sintonisa e bunita documentario aki cu lo pasa dia 17 di maart na Nos Isla TV na canal 23 y pa Diatio TV Canal 48 pa 7 pm. Minister Maduro ta gradici famia Wever, SkyTelevision, tur persona y instancia cu a colabora pa asina conserva pa posterioridad e historia di nos musico completo sr. Rufo Wever.



Relaciona cu Celebracion Dia di Himno y Bandera 2022

MINISTER MADURO: TUR SCOL TA RICIBI

VIDEO INFORMATIVO Y EDUCATIVO

'CONOCE NOS HIMNO, NOS BANDERA Y NOS ESCUDO'

Un invitacion pa scol basico participa den 'Kibra Coco Edicion Himno y Bandera' y scolnan preparatorio den competencia 'Un Rima pa Mi Isla'

Manera ta un custumber pa e celebracion di Dianan Nacional y Fiestanan Cultural Tradicional, Ministerio di Cultura, hunto cu Departamento di Cultura y Comision Celebracion Dianan Nacional ta prepara material informativo y educativo pa nos muchanan di scol preparatorio y basico.

Video "Conoce mi Himno, mi Bandera y mi Escudo":

Pa e celebracion di Dia di Himno y Bandera 2022 a prepara e aña aki pa scolnan basico un produccion digital cu lo tin como titulo "Conoce Nos Himno, Nos Bandera y Nos Escudo". E video aki tur scol por download esaki via e link <https://youtu.be/veTLygvkdQ4> of por download esaki for di e youtube channel di Minister Xiomara Maduro. Cu e video aki tur alumno di scolnan preparatorio, basico y enseñansa special tin informacion digital y na forma innovativo. E video aki ta un material educativo pa docentenan y tambe ta un preparacion pa tur alumno di scol basico pa e Competencia Nacional 'Kibra Coco' (Quiz), edicion Dia di Himno y Bandera. Un gradicimento ta bay na Ministerio di Cultura, Comision Celebracion Dianan Nacional, Comision di maestronan, Sr. Levy Geerman, Departamento di Cultura, Archivo Nacional Aruba y Tlearuba pa nan cooperacion pa por haci e bunita produccion educativo aki posibel.

Scolnan Preparatorio – Un Rima pa mi Isla:

Pa locual ta scolnan preparatorio Ministerio di Cultura y Comision Celebracion Dianan Nacional ta organisa un competencia di "Un Rima pa mi Isla". Esaki ta un competencia pa klasnan di scolnan preparatorio. Manera ya anuncia e reglanan ta:


1. E rima mester contene 4 verso (regel);
2. E rima mester ta na Papiamentu;
3. E rima mester expresa un mensahe relaciona cu Aruba su Himno y Bandera
4. Tur klas por participa;
5. E docente ta graba su muchanan cu celular y manda e video na ccdn@cultura.aw y e comision organisador lo load esaki riba e facebook page di CCDN y Minister di Cultura Xiomara Maduro;
6. Recordatorio cu e ultimo dia pa entrega e video ta

diaranson 16 di maart 2022

7. E video ganador "Un Rima pa Mi Isla" lo wordo presenta durante Competencia Kibra Coco, cual lo ta diasabra 19 di maart iniciando pa 5 or di atardi.

Siman pasa tur informacion a sali pa tur scol preparatorio. Si ainda por tin pregunta por manda esaki na ccdn@cultura.aw of yama na Departamento di Cultura na 582- 2185.

Minister di Cultura Xiomara Maduro ta desea tur scol basico hopi exito den e Competencia "Kibra Coco, Edicion Dia di Himno y Bandera" y tambe exito na tur scol preparatorio den e Competencia "Un Rima pa Mi Isla".





DEN WEEKEND NOS TURISMO TA SIGUI CRESE DEN UN BON RITMO

Minister di Turismo y Salud Publico Sr. Dangui Oduber ta contento cu un otro weekend exitoso tras di lomba. Aruba ta den pleno recuperacion di su turismo y e cifranan no ta gaña. Den weekend cu a pasa aeropuerto di Aruba a ricibi casi 10 mil turista. Riba diasabra a yega 6069 turista di cual 5337 turista tabata procedente di Estados Unidos. Riba diadomingo aeropuerto a ricibi un total di 3828 turista di cual 3384 turista a yega for di Estados Unidos. Estados Unidos ta keda Aruba su mercado di mas importante, pesey semper ta keda monitoria e ruta nan aki di serca.



E exit strategy ta dunando e resultado cu nos kier mira, asina minister Oduber a trece dilanti.

Gobierno a tuma e decision cu Aruba ta bolbe bek na normalidad y asina elimina tur restriccion cu tawata existi. Cu esaki kier focus pa Aruba su recuperacion di turismo pa asina recupera e economia y crea oportunidadnan cu pais Aruba tin mester di dje.



Minister Oduber tin tur confiansa cu e aña 2022 ta e aña cu Aruba lo recupera turismo bek na e nivelnan di aña 2019. Mester sigui enfatisa cu e logro di Aruba su recuperacion ta di gradici na esfuerzo nan conhuntito di Ministerio di Turismo y Salud Publico conhuntito cu partners manera ATA, AAA, APA & AHATA.

Minister Dangui Oduber ta satisfecho y tambe optimista di con turismo lo sigui progresa. Turismo ta keda e driver principal di nos economia.





MINISTER ENDY CROES A REUNI CU MIEMBROAN DI EERSTE KAMER HUNTO CU PROME MINISTER EVELYN WEVER-CROES Y MINISTER GEOFFREY WEVER



Siman pasa Minister Endy Croes conhuntamente cu Prome Minister Evelyn Wever - Croes y Minister Geoffrey Wever a reuni cu e Parlamentarionan di Eerste Kamer di Hulanda kendenan tabata di bishita na Aruba den cuadro di reunion anual. E Parlamentarionan a bishita diferente isla y Aruba pa haya un miho bista di kico ta sosodiendo. Durante e reunion a trata diferente topiconan manera entre otro e situacion financiero di Aruba, COHO y RAFT.

Banda di e temanan aki a trata tambe combatimento di corrupcion, importancia di integridad pa Gobierno. E tema di crisis di Venezuela y e impacto cu e crisis aki tin riba Aruba tambe a bin dilanti. particularmente e situacion di cantidad di personanan cu a pidi asilo, e cantidad di personanan cu ta na Aruba sin documentacion, e impacto cu esey tin riba nos



infraestructura, nos enseñansa, cuido di salud, y e ayudo di Hulanda cu Aruba a ricibi. Minister Endy Croes a expresa e tabata un bon reunion y ta contento cu Parlamentarionan tabata asina receptivo pa scucha unda a intercambia diferente idea.

Minister Endy Croes: ARUBA, CURAÇAO, SINT MAARTEN & HULANDA A FIRMA ACUERDO PA TRAHA HUNTO NA BIENESTAR GENERAL DI ENSEÑANSA



Durante Minister Endy Croes su bishita di trabao na Hulanda a reuni cu Ministernan di Enseñansa di Hulanda sr. Robbert Dijkgraaf, sr. Sithree van Heydoorn di Curaçao y Rodolphe Samuel di Sint Maarten unda a firma un acuerdo di 13 tema esta e 13 compromiso den e 'Vierlandenoverleg'. Ta puntonan cu e cuatro paisnan den Reino lo traha hunto na bienestar di enseñansa en general.

Un punto interesante ta reconocimiento di nos studiantenan por ehempel cu studia ley na Universidad di Aruba ta wordo acepta mesora na Hulanda y por eherse nan funcion sin ningun problema na tur cuatro pais. E Mandatario a expresa cu Minister Robbert Dijkgraaf y staf a ricibi nos hopi bon y ta para man habri pa duna nan aporte den enseñansa. Finalizando e Minister Endy Croes a enfatisa e tabata un bon reunion sigur uno sumamente exitoso unda a firma convenio pa traha hunto riba varios punto.





NOS TA CELEBRA 10 STORIA DI VICTORIA



Den cuadro di Formacion Social, tabata pa mi un privilegio representa mi colega, amigo, ruman Minister Rocco Tjon siman pasa. Den su nomber mi a entrega certificadonan na 10 hoben di SVT, confirmando cu nan a logra termina nan formacion social cu exito.

Cu e certificado den man, e hobennan aki a dicidi di tuma nan futuro den nan propio man dunando nan mes un bunita perspectiva.



Masha masha pabien na tur graduado. Un danki na Minister Rocco Tjon cu ta reconoce e importancia di SVT y a adopta mesora e proyecto aki pa su balor agrega cu e ta brinda nos hobennan.

Finalmente, pronto e proximo trayecto di Formacion Social ta inicia. Inscribi.

Gobierno di Aruba: Durante un ceremonia solemne, **GOBIERNO TA CONMEMORA DOS AÑA DI COVID-19 NA ARUBA Y TA RECORDA CIUDADANONAN CU A FAYECE CU COVID DURANTE E PERIODO AKI**

Mientras cu na comienso di Covid-19, ningun ciudadano di mundo por a pensa cu e pandemia aki lo a dura asina largo, diadomingo dia 13 di maart a cumpli dos aña di Covid-19 na Aruba. Pa e motibo aki, Gobierno di Aruba, hunto cu CrisisTeam a tene un ceremonia solemne na Bestuurskantoor pa asina conmemora e hecho aki y especialmente pa recorda e victimanan cu a fayece cu Covid-19 durante e periodo aki. 'Den Union pa Recorda y miho Speransa pa Futuro'.

Presente na e ocasion tawata Presidente di Parlamento, señor Edgard Vrolijk, Miembronan di Parlamento, Prome Minister Evelyn Wever-Croes, Minister di Salubridad Señor Dangui Oduber y demas ministernan, Secretario di Consejo di Minister señora Grace Koolman, Rino Hermans di CrisisTeam, Sharline Koolman di DVG, Ronella Croes di Ata, Vanessa Tjon-Kock y demas invitadonan cu a acudi na e yamada pa atende e acto solemne aki.

Na e ocasion a hiba palabranan Prome Minister, señor Rino Hermans, señora Sharline Koolman, señora Ronella Croes y Minister Dangui Oduber. Tur a menciona con a maneha e crisis durante dos aña y con a logra pa awe Aruba ta recuperando di e pandemia aki.

Despues di e discursonan, a tuma luga un ofrenda floral hopi emocional pa despues tuma tambe un minuut di silencio pa tur esnan cu a fayece cu Covid den e dos añanan tras di lomba. Na final a cende e luz di speransa como un simbolo pa ilumina nos dushi Aruba.





NO KEDA WARDÁ PA OPORTUNIDADNAN YEGA NA BO.

LANTA Y CREA E CAMINDA DI OPORTUNIDAD BO DILANTI Y

LAGA ATRAS EFECTONAN POSITIVO PA OTRO SIGUI BO TRAS.

Feliz Siman!